

**Kalaallit Nunaanni ilisimatusarnernut tamanut ataatsimut qarasaasiami paasissutissanik katersivimmik pilersitsinissamik periarfissat misissorneqarnissaat pillugu Naalakkersuisut peqquneqarnissaannik Inatsisartuni aalajangiiffigisassatut siunnersuut.**

(Inatsisartuni ilaasortaq Mimi Karlsen, Inuit Ataqatigiit)

**Akissuteqaat**

Pinngortitamut, Avatangiisinut Ilisimatusarnermullu Naalakkersuisoq

**Siullermeerneqarnera**

Naalakkersuisuniit Kalaallit Nunaanni ilisimatusarnernut tamanut ataatsimut qarasaasiami paasissutissanik katersivimmik pilersitsinissamik periarfissat misissorneqarnissaat pillugu Naalakkersuisut peqquneqarnissaannik Inatsisartuni aalajangiiffigisassatut siunnersuuteqartoqarnera pillugu qujavugut. Siunnersuut sulianut ingerlareersunut naapertuuppoq. Nunatut ilisimatusarfiusutut inissisimanitsinnik nukittorsaaneq Naalakkersuisut sulissutigaa. Nunap iluani nunanilu tamalaani ilisimatusarnerit nunatsinnit aallaaveqarnissaat qulakkeerniarlugu Kalaallit Nunaanni ilisimatusarnerni nunat tamalaat katersuuffiannik, aammattaaq ilisimatusarnermi HUB-imik taagorneqartumik pilersitsinissaq Naalakkersuisunit siunnerfigineqarpoq.

Katersuuffiliornermi siunertarineqarpoq,

- Nunap iluani nunanilu tamalaani ilisimatusartut, ingerlatsiviit, suliffissuit aammalu Kalaallit Nunaanni innuttaasut katersuuffissaannik pilersitsinissaq
- Nunatsinni nunattalu eqqaani ilisimatusarnernut aammalu ilisimatusarnermi paasissutissanik katersuivinnut takussutissiornissaq aallaavissinissarlugu
- Ingerlatsiviit, ilisimatusartut, suliffissuit innuttaasullu akornanni misissuinerit inernerinik ilisimatusarfissatullu pisariaqartitanik ingerlatitseqqittarnerup attaveqatigiinnerullu pitsaanerulernissaannik qulakkeerinissaq

Ilisimatusartut, oqartussaasut, inuussutissarsiortut suliniaqatigiiffiillu akimorlugit qanittumik suleqatigiittoqarnissaa Naalakkersuisut pingaartippaat. Nunani tamalaani ilisimatusartut amerlanerusut nunatsinnut pilerisaarnissaat pingaaruteqarpoq, katersuuffillu nunatsinni ilisimatusarnermut nunarsuarmiunngorsaaneermullu siuarsaaqataasinnaavoq. Tamatuma peqatigisaanik katersuuffik nunani tamalaani ilisimatusartut nunatsinnilu suleqatigisaasa qaninnerusumik attaveqatigiilernissaannut qulakkeerinnaavoq. Tassalu ilisimatusarnikkut katersuuffeqarnek suliani avatangiiserisassanik pilersitseqataaffiusinnaavoq aammalu Kalaallit Nunaanni ilisimatusarnikkut sulianik pitsannguiffiusinnaalluni.

Aamma katersuuffik ingerlatitseqqinnissamut aallaavissanik imaqassaaq, inuiaqatigiit paasisaqarnerunissaannut aammalu nunatsinni ilisimatusarfissanut sunniuteqarsinnaanissaannut qulakkeeriffiusumik.

Kalaallit Nunaanni ilisimatusarnermi nunani tamalaani katersuuffissamut suliassat allattorsimaffiannik allaaserinninnissamut atatillugu Pinngortitamut, Avatangiisinut Ilisimatusarnermullu Naalakkersuisoqarfiup Kalaallit Nunaanni Ilisimatusarnermi Siunnersuisooqatigiit, ilisimatusarfiit, Kalaallit Nunaanni nunanilu allani ilisimatusartut, kiisalu Danmarkimi Ilisimatusarnermut Ilinniartitaanermullu Aqutsisoqarfik ingerlaavartumik oqaloqatigai.

Naalakkersuisunit Kalaallit Nunaanni ilisimatusarnernut tamanut ataatsimut qarasaasiami paasissutissanik katersivimmik pilersitsinissamik periarfissat misissorneqarnissaannut siunnersuut tapersorneqarpoq. Misissuineq ilisimatusarnermi paasissutissanik qitiusumik katersuivik, Kalaallit Nunaanniit ilisimatusarnermi saqqummersitanik imalik qanoq iliorluni naleqqunnerpaamik

aaqqissuunneqarsinnaanersoq, aammalu Kalaallit Nunaanni ilisimatusarnerni nunani tamalaani katersuuffissamut ilaatinneqalersinnaanersoq pillugu paasiniaanermut iluaqutaasinnaavoq.

Taamaattumik siunnersuutip akuerineqassasoq Naalakkersuisunit inassutigineqarpoq.